

迁江縣志

遂江縣志

遷江縣志序

縣之有志猶國之有史也然與作史異康熙中嘗頒河南通志於天下爲修志之式雍正七年

詔各

直省纂輯通志亦經部頒條例修志誠重矣哉自嘉慶中謝

蘊山修廣西通志仿景定建康志例爲典一表四略十錄二傳八實二百餘年來官書創體道光初阮文達重修廣東志仍而效之遂爲耆古好奇者之濫觴邑志例不進呈與通志少異體例亦稍寬要皆爲徵信之書則一也竊以爲志之體無他簡括而已矣志之用無他確實而已矣康對山撰武志不過二卷韓邦靖撰朝邑志不過七篇而不知古者併說

言說事而據依之則不實不知今者取俗人俗文而雜登之則不簡且星野之說杳冥而難憑八景之名沿襲而皆是誠者譏焉遷江爲荒遠邊徼紀載缺如無所資以爲考證又少名人遷客流寓歌詠藉以潤色大令乃能旁蒐遠訪手自創訂一以簡括確實爲歸不可謂非難能而可貴也已考方志古稱圖經圖與表河南通志皆有之又古之地志止載方域山川物產而元和郡縣志兼及古蹟太平寰宇記並及人物藝文蓋以綱統目以簡御煩而皆無以易乎簡實之說者斯志首列輿圖統以三表其餘各以類從而無徵者缺焉不經者黜焉班生錄本朝之書猶云俟考沈氏徵近世之壤尙著

存疑爲體雖與史異而傳信要與史同已抑余更有進者遷
江今隸思恩爲陽明勘定之區山川扼塞地土境瘠自明以
來民俗儉嗇有古唐魏遺風官斯土者當思何以生息蕃滋
由富加教士生其間亦思自振厲而有以步趨陽明之學術
事功吾見地以人傳行且增輝史冊焉又豈特爲志乘光已
哉是則願爲大令勉而並爲遷之人勉者也光緒十有七年
四月既望撫輿使者安陽馬丕瑤

遷江縣志簡帙序

古之地志所紀者山川方域風俗物產而已厥後踵事增華
條例漸備沿及末流秉筆者不知體要於是錄人物則並登
諛墓之詞列藝文則兼及遺懷之作而於政教之隆替風化
之貞淫章程之損益其有關國計民生者轉至擇不精而語
弗詳明代武功朝邑兩志敘述簡核爲時所稱然武功志載
織錦璇璣圖王漁洋猶謂爲文人愛博之病蓋折衷盡善戛
戛乎其難之矣遷江爲嶺嶠邊地向無志乘邑令顏君義宣
學術治績卓有可觀再任政成爰於簿書之暇蒐輯成書邇
示索序因得而瀏覽之其大旨取資於鄭小谷比部所撰象

州志而變四帙爲十六門各皆冠以小序閒或附以所著詞章文質多寡之數斟酌而化裁之要以事確言核叙次簡當爲歸其體謹而嚴其詞麗以則其持論正而用力勤考之古而驗之今固皆確有依據而非繁徵博引擗摭陳言者所可相提並論也語有之不習爲吏視已成事士大夫甫膺民社將欲救弊補偏興養立教非導以先桃不爲功是書之成顏君蓋欲使後之來者一展卷間而疆域鎮戍官師人物土俗風謠瞭然豁然因詳求其因革裁制之宜爲化民成俗之本凡備掌故而昭懲勸胥於是乎賴之謂執簡以御繁可也然則削牘操觚翔實爾雅正不獨文采斐然近可媲美小苾比

部遠與康對山韓五泉二公後先輝映已也顏君之用意深
遠其尤足多乎哉時

光緒辛卯季夏花翎頭品頂戴廣西等處承宣布政使司布
政使江都張聯桂謹序

序

志者誌也將以誌所必當誌而使後之人知所考也故自一
統志而省志而郡州縣志皆各誌其所必當誌焉遷邑舊本
無志古筑顏義宣明府以名解元來宰斯邑適值大亂初平
之後與民休息元氣漸復教養兼盡百廢具興因慨然有念
於遷處粵之邊鄙濡染

聖化

已久而文獻無徵創修縣志倣鄭小谷比部象州志之意而

更加以詳贍閱其凡例綱舉目張自輿圖以至紀事別類分
門一十有六然仍不外乎象志之紀地紀官紀人紀故者近
是所謂師其意而不必襲其文也蓋遷志自無而之有象志

猶有舊志之可稽其纂修之難實倍於象志矣而誌其所必
當誌其所不必誌與不當誌者概屏焉文雖不同其義則一
志旣成余故樂序之質諸義宣並質諸遷江人士俾知誌所
必當誌之義而於志之創者尤宜慎也以視象志爲何如哉
光緒十有七年秋八月三品銜署廣西按察使太平歸順兵
備道監督鎮南關務新建蔡希邠譔

序

周官外史掌四方之志鄭氏謂若魯春秋晉乘楚檮杌之比而近世省府廳州縣各志實於此權輿志也者所以考古證今聞幽勵俗上以見

聲教暨訖之廣下以酌因時興革之宜並非博引繁稱馳騁文藻已也遷江本蠻地與潯柳界屬昆連實制邕管之上游爲兩江之障蔽民獠錯處控制綦難昔宋狄武襄討儂智高曾勒兵於邑東南明王文成所平八寨今之八所屯卽其一也當唐大厯中置屬羈縻思岡州迨宋天禧朝姑易今名屬賓州元明因之

國朝雍正十二年乃偕賓州隸思恩焉粵省介在邊徼土薄以瘠
屢經兵燹郡縣守土吏或狃於前有成書漠然不復以編輯
爲念其本無志書者又每以集費艱鉅或慨歎乎著述之才
之難卽事易舉方其置議未定代者已楊鑣入郭矣故令者
補苴旦夕皇皇爲治而欲於簿書期會紛迫之頃責其重且
難之爲其置而不暇又奚怪焉人駿以己丑秋奉分守桂平
梧道之命與都人士談卽聞粵西多循吏休息培養駸駸
有鄒魯風及抵粵於接見寮屬時聞述賢司牧者復耳遷江
大令顏君義宣名心竊識之而猶未知其詳也仲夏義宣以
手纂遷江志稿郵示並索序言亟讀之見其於古今沿革山

川之險易物產之良窳民情習尚純駁得失作三表十畧附以列傳紀事跋文且於每彙終綴以所著望眉詩文及前人之作雖詞不厭簡體例一本象志而一展卷間於一邑之利病土俗扼塞風謡罔不豁然瞭然始歎義宣之勤求民瘼拊循有本者將以易偏隅獷悍之風沐

盛世休明之化又豈僅以吏行冰上人在鏡中多義宣之明允博洽爾哉因不辭謫陋泚筆而爲之序

光緒辛卯仲夏分守廣西桂平梧鹽法道豐潤張人駿謹序

序

庚寅八月之左江廵道任道出遷江時貴筑顏義宣大令以名元宰是邑適館授餐意殷然也晤言俄頃其篤雅之概循良之色見於眉宇深爲邑人慶至邕後詢之知大令者莫不稱道弗衰文翁細侯之賢不能擅美於前矣今者郵寄尺書以所著遷江縣志略見示屬爲之序披讀數番於作志體要該括靡遺別類分門各系小序紀事纂言無取冗長使紅水江榜印諸山之間文獻有徵爲邊邑光固知遷江向未有志大令以修自任實則創舉非篤雅循良者能若是乎楫學久荒落無以副誼諉姑以去年相見之誼半載心寫之情書諸